

儒道釋夏四尼經略

持經弟子盧文輝
結集

淨天地神咒

天地自然 穢氣紛散 洞中玄虛 晃朗太元
八方威神 使我自然 靈寶符命 普告九天
乾羅怛那 洞罡太玄 斬妖縛邪 殺鬼萬千

中山神咒 元始玉文 持誦一遍 卻鬼延年
按行五嶽 八海知聞 魔王束首 侍衛我軒
凶穢消散 道炁常存 急急如律令

拜手稽首

儒仲尼氏執中一貫聖教度世大宗師
道清尼氏守中得一玄教度世大宗師

釋牟尼氏空中歸一禪教度世大宗師
夏午尼氏道統中一三教度世大宗師

儒經

大學

大學之道。在明明德。在親民。在止於至善。知止而後有定。定而後能靜。靜而後

能安。安而後能慮。慮而後能得。物有本末。事有終始。知所先後。則近道矣。古之欲明明德於天下者。先治其國。欲治其國者。先齊其家。欲齊其家者。先修其身。欲修其身者。先正其心。欲正其心者。先誠其意。欲誠其意者。先致其知。致知在

格物。物格而後知至。知至而後意誠。意誠而後心正。心正而後身修。身修而後家齊。家齊而後國治。國治而後天下平。自天子以至於庶人。壹是皆以修身為本。其本亂而末治者。否矣。其所厚者薄。而其所薄者厚。未之有也。此謂知本。此謂知

之至也。

中庸

天命之謂性。率性之謂道。修道之謂教。

道也者。不可須臾離也。可離非道也。是故君子戒慎乎其所不睹。恐懼乎其所不聞。莫見乎隱。莫顯乎微。故君子慎其獨

也。喜怒哀樂之未發。謂之中。發而皆中節。謂之和。中也者。天下之大本也。和也者。天下之達道也。致中和。天地位焉。萬物育焉。

道經

常清靜經

大道無形。生育天地。大道無情。運行日月。大道無名。長養萬物。吾不知其名。強名曰道。夫道者。有清有濁。有動有靜。天清地濁。天動地靜。男清女濁。男動女靜。降本流末。而生萬物。清者濁之源。動者靜之基。人能常清靜。天地悉皆歸。

夫人神好清。而心擾之。人心好靜。而欲牽之。若能常遣其欲。而心自靜。澄其心。而神自清。自然六欲不生。三毒消滅。所以不能者。為心未澄。欲未遣也。能遣之者。內觀其心。心無其心。外觀其形。形無其形。遠觀其物。物無其物。三者既悟。

惟見於空。觀空亦空。空無所空。所空既
無。無無亦無。無無既無。湛然常寂。寂
無所寂。欲豈能生。欲既不生。即是真靜。
真常應物。真常得性。常應常靜。常清靜
矣。如此清靜。漸入真道。既入真道。名
為得道。雖名得道。實無所得。為化眾生。

名為得道。能悟之者。可傳聖道。上士無
爭。下士好爭。上德不德。下德執德。執
著之者。不名道德。眾生所以不得真道者。
為有妄心。既有妄心。即驚其神。既驚其
神。即著萬物。既著萬物。即生貪求。既
生貪求。即是煩惱。煩惱妄想。憂苦身心。

便遭濁辱。流浪生死。常沉苦海。永失真道。真常之道。悟者自得。得悟道者。常清靜矣。

釋經

摩訶般若波羅蜜多心經

觀自在菩薩。行深般若波羅蜜多時。照見

五蘊皆空。度一切苦厄。舍利子。色不異空。空不異色。色即是空。空即是色。受想行識。亦復如是。舍利子。是諸法空相。不生不滅。不垢不淨。不增不減。是故空中無色。無受想行識。無眼耳鼻舌身意。無色聲香味觸法。無眼界。乃至無意識界。

無無明。亦無無明盡。乃至無老死。亦無老死盡。無苦集滅道。無智亦無得。以無所得故。菩提薩埵。依般若波羅蜜多故。

心無罣礙。無罣礙故。無有恐怖。遠離顛倒夢想。究竟涅槃。三世諸佛。依般若波羅蜜多故。得阿耨多羅三藐三菩提。故知

般若波羅蜜多。是大神咒。是大明咒。是
無上咒。是無等等咒。能除一切苦。真實
不虛。故說般若波羅蜜多咒。即說咒曰。
揭諦揭諦。波羅揭諦。波羅僧揭諦。菩
提娑婆訶。

夏經

三教本一

沙界之華。龍天之夏。而為儒者曰。我儒也。為道者曰。我道也。為釋者曰。我釋也。教既分而三矣。而余之意。則欲會而歸之。以復合於孔老釋迦之道之本一也。余嘗概與所可使由者言。惟本是立。所以

教其始。余嘗概與所可使知者言。惟門是入。所以教其中。豈曰。惟門是入。以教其中。抑且惟則是極。以教其終。然孔老釋迦之教。亦皆有始。亦皆有中。亦皆有終。而孔老釋迦之道。亦無有始。亦無有中。亦無有終。夫教較然而三也。若不知

孔老釋迦之教之所以三。則無以識其一。而為道之至。道渾然而一也。若不知孔老釋迦之道之所以一。則無以統其三。而為教之大。既識其一。復統其三。較然非三。渾然非一。大矣哉。至矣哉。此儒道釋之所同。而孔老釋迦之能事畢矣。且人之性

本善也。本是孔老釋迦。本自時中。本自清靜。本自寂定。而非有待於孔老釋迦。而後能時中。而後能清靜。而後能寂定。而後能孔老釋迦也。中庸曰。惟天下至誠。為能盡其性。誠之有未至者。性之有未盡也。而盡人之性。盡物之性。以參天地。

以贊化育。乃吾性之分量。至誠之極功也。
未至乎此。而曰教曰道者。則是教其所教。
而非其教之大也。道其所道。而非其道之
至也。然教本於道。道本於性。余於是而
知。能性吾之性以為性。則孔老釋迦之道
可得而道。斯其為道也至矣。道吾之道以

為道。則孔老釋迦之教可得而教。斯其為教也大矣。

真我昌言

我其非我乎。非我其我乎。而上之極乎天地之外。不可得而復上之者。皆虛空也。其皆我乎。其非我乎。下之極乎天地之外。

不可得而復下之者。皆虛空也。其皆我乎。
其非我乎。東之極乎天地之外。不可得而
復東之。西之極乎天地之外。不可得而復
西之。而南而北。而極乎天地之外。不可
得而復南之。而復北之者。皆虛空也。其
皆我乎。其非我乎。蓋天地特我虛空中之

一器爾。一器之內。日月臨焉。星辰系焉。
雷霆鼓焉。風雨潤焉。山嶽峙焉。河海流
焉。與夫靈而為人。蠢而為物。而散殊於
一器者。何者非我方寸中生生不息。神變
無方也。由是觀之。虛空我也。而天地一
器。乃我虛空中之一方寸爾。故我虛空也。

而未始儒也。若天皇氏。地皇氏。人皇氏。
尚矣。而帝天下。則有庖羲氏。神農氏。
黃帝氏。唐放勳氏。虞重華氏者。王天下
則有夏后氏禹。商曰成湯。周曰文王武王
者。相天下。則有周公。師萬世。則有孔
子。孔子傳之曾參。曾參傳之孔伋。孔伋

傳之孟軻。從古以來至於今。自今以往。而至於千萬世之遠。而聖人。而君子。而善人。諸凡有以儒名者。其皆我乎。其非我乎。非我是我。而寂感於我虛空中矣。我虛空也。而未始道也。若玉清元始天尊。上清靈寶天尊。太清道德天尊。尚矣。而

六禦天尊。則有昊天玉皇上帝。東極青宮
度生上帝。玉虛上宮天皇大帝。周天星主
北極紫微大帝。太微南極長生大帝。承天
效法后土皇地祇。五方五老。則有東方青
靈始老九炁天君。南方赤靈丹老二炁天君。
西方鬱靈皓老七炁天君。北方玄靈真老五

炁天君。中央元靈黃老一炁天君。從古以
來至於今。自今以往。而至於千萬世之遠。
而天仙。而地仙。而人仙。諸凡有以道名
者。其皆我乎。其非我乎。非我是我。而
寂感於我虛空中矣。我虛空也。而未始釋
也。若清淨法身毗盧遮那佛。圓滿報身盧

舍那佛。千百億化身釋迦牟尼佛。尚矣。而有以祖稱者。初祖迦葉。二祖阿難。二十八傳。則有達摩。達摩西來。五傳則有惠能。是謂三十三祖。有以聖稱者。二十有五聖。又有以祖師稱者。列而為五。曰臨濟。曰瀉仰。曰雲門。曰曹洞。曰法眼。

者。五宗也。過去恒河沙無數佛。現在恒
河沙無數佛。未來恒河沙無數佛。諸凡有
以釋名者。其皆我乎。其非我乎。非我是
我。而寂感於我虛空中矣。由是觀之。何
者不是儒。何者不是我。何者不是道。何
者不是我。何者不是釋。何者不是我。何

者不是天地。何者不是我之妙用。何者不是虛空。何者不是我之本體。故孔子儒我以為儒。老子道我以為道。釋迦釋我以為釋。天地用我以為用。虛空體我以為體。無儒無道無釋。無天地無虛空。而無非我也。我而無我。無我而我。無我無無我。

無無我無我。

儒道釋夏三十六贊

拜手稽首

儒仲尼氏執中一貫聖教度世大宗師

贊曰

道祖唐虞精一傳
周公夢寐契先天

春秋大義天王重
二百餘年南面權

唵 金齒臨 玉齒臨 吽

拜手稽首

道清尼氏守中得一玄教度世大宗師

贊曰

金臺玉局繞彤雲
上有真人稱老君

八十一化長生訣
五千餘言不朽文

唵 金齒臨 玉齒臨 吽

拜手稽首

釋牟尼氏空中歸一禪教度世大宗師

贊曰

雪山苦行六年多
自性金剛斷眾魔

四偈擘開千佛秘
瞿曇花下笑彌陀

唵 金齒臨 玉齒臨 吽

拜手稽首

夏午尼氏道統中一三教度世大宗師

贊曰

道脈相傳自有真
東山烏石現麒麟

混元五百三龍會
孔老釋迦合一身

唵 金齒臨 玉齒臨 吽

拜手稽首

儒仲尼氏執中一貫聖教度世大宗師

贊曰

用舍行藏無固滯
盛德大業難為繼

上下魯論二十篇 得之可王亦可帝

唵 金齒臨 玉齒臨 吽

拜手稽首

道清尼氏守中得一玄教度世大宗師

贊曰

彌羅萬梵列諸天 太上尊居元始前

自本自根自造化
真常得性道自然

唵 金齒臨 玉齒臨 吽

拜手稽首

釋牟尼氏空中歸一
禪教度世大宗師

贊曰

如如不動虛空主
無生無滅無來去

靈山會上法門開
合掌虔恭承密語

唵 金齒臨 玉齒臨 吽

拜手稽首

夏午尼氏道統中一
三教度世大宗師

贊曰

道在先天天弗違
三門從此有依歸

古今天地大公案
微我夫子定者誰

唵 金齒臨 玉齒臨 吽

拜手稽首

儒仲尼氏執中一貫聖教度世大宗師

贊曰

悟入庖羲未畫前
何思何慮本寂然

成能設位機相待
予欲無言祇一天

唵 金齒臨 玉齒臨 吽

拜手稽首

道清尼氏守中得一玄教度世大宗師

贊曰

有物混成天地先
起乎虛無體自然

不雕不琢守其樸
為無為兮玄更玄

唵 金齒臨 玉齒臨 吽

拜手稽首

釋牟尼氏空中歸一禪教度世大宗師

贊曰

本來面目是真如
舍利光中認得渠

大地山河藏一竅
一竅猶能納太虛

唵 金齒臨 玉齒臨 吽

拜手稽首

夏午尼氏道統中一三教度世大宗師

贊曰

大道無名孰與傳
非儒非釋亦非玄

倡明三氏歸無始
了卻先天與後天

唵 金齒臨 玉齒臨 吽

拜手稽首

儒仲尼氏執中一貫
聖教度世大宗師

贊曰

乾坤之始易之先
別有爻象非言詮

三絕韋編窺妙旨
忘憂忘食又忘年

唵 金齒臨 玉齒臨 吽

拜手稽首

道清尼氏守中得一玄教度世大宗師

贊曰

杳杳冥冥開眾妙
恍恍惚惚保真竅

斂之潛藏一粒中
放之彌漫六合表

唵 金齒臨 玉齒臨 吽

拜手稽首

釋牟尼氏空中歸一禪教度世大宗師

贊曰

圓覺經成萬法畢
直了多羅解真實

一切清淨菩提心
摩訶般若波羅蜜

唵 金齒臨 玉齒臨 吽

拜手稽首

夏午尼氏道統中一三教度世大宗師

贊曰

正氣浩然週一切
遍滿六虛廣無際

度天度地度鬼神
度己度人度萬世

唵 金齒臨 玉齒臨 吽

拜手稽首

儒仲尼氏執中一貫聖教度世大宗師

贊曰

仁義禮智信其中
溫良恭儉讓其容

蕩蕩擴千聖之統
巍巍立百王之宗

唵 金齒臨 玉齒臨 吽

拜手稽首

道清尼氏守中得一玄教度世大宗師

贊曰

數不得限命不拘
翱翔天外鶴為輿

身中自有一天地
造化天地體太虛

唵 金齒臨 玉齒臨 吽

拜手稽首

釋牟尼氏空中歸一禪教度世大宗師

贊曰

陀羅門啟真如出
圓覺海中光慧日

四十九年說法言
舌上蓮花古文佛

唵 金齒臨 玉齒臨 吽

拜手稽首

夏午尼氏道統中一三教度世大宗師

贊曰

寂然不動感遂通
天地日月屬包籠

妙用總持歸一貫
化機參兩有中庸

唵 金齒臨 玉齒臨 吽

拜手稽首

儒仲尼氏執中一貫聖教度世大宗師

贊曰

明體適用學之正
窮神知化德之盛

金聲玉振集大成
生民以來稱至聖

唵 金齒臨 玉齒臨 吽

拜手稽首

道清尼氏守中得一玄教度世大宗師

贊曰

道在混元無始先
總司玄化統萬靈

函關西出青牛駕
神沼丹成別有天

唵 金齒臨 玉齒臨 吽

拜手稽首

釋牟尼氏空中歸
一禪教度世大宗師

贊曰

一顆明珠光燁燁
照盡億萬無窮劫

大乘金剛般若經
諸天諸地咸統攝

唵 金齒臨 玉齒臨 吽

拜手稽首

夏午尼氏道統中一三教度世大宗師

贊曰

三一堂開夏日長
網維午運復真陽

聖玄禪愈擴愈大
儒道釋彌遠彌光

唵 金齒臨 玉齒臨 吽

拜手稽首

儒仲尼氏執中一貫聖教度世大宗師

贊曰

六經刪定古文章
洙泗源深教澤長

繼往開來參造化
大成至聖道之綱

唵 金齒臨 玉齒臨 吽

拜手稽首

道清尼氏守中得一玄教度世大宗師

贊曰

浮空結氣凝真容
變現神通不可窮

曾托胎於玄妙女
復寄跡為河上公

唵 金齒臨 玉齒臨 吽

拜手稽首

釋牟尼氏空中歸一禪教度世大宗師

贊曰

不住空兮不住色
既登彼岸舍舟楫

拈花座上眾默然
破顏微笑惟迦葉

唵 金齒臨 玉齒臨 吽

拜手稽首

夏午尼氏道統中一三教度世大宗師

贊曰

經傳中一闡三尼
千古斯文今在茲

百尺竿頭更進步
虛空真宰天人師

唵 金齒臨 玉齒臨 吽

拜手稽首

儒仲尼氏執中一貫聖教度世大宗師

贊曰

萬古大聖惟孔子
即心即聖即孔子

時中一貫乃真傳
記誦詞章非孔子

唵 金齒臨 玉齒臨 吽

拜手稽首

道清尼氏守中得一玄教度世大宗師

贊曰

萬古大玄惟老子
即心即玄即老子

守中得一乃真傳
荒唐迂怪非老子

唵 金齒臨 玉齒臨 吽

拜手稽首

釋牟尼氏空中歸一禪教度世大宗師

贊曰

萬古大禪惟釋迦
即心即禪即釋迦

空中歸一乃真傳
圓坐斷滅非釋迦

唵 金齒臨 玉齒臨 吽

拜手稽首

夏午尼氏道統中一三教度世大宗師

贊曰

萬古大夏惟林子
即心即夏即林子

道統中一乃真傳
抗志靜孤非林子

唵 金齒臨 玉齒臨 吽

拜手稽首

儒仲尼氏執中一貫聖教度世大宗師

贊曰

我學孔子我是儒
聲臭俱無一太虛

若藉見聞能悟性
羲皇以上讀何書

唵 金齒臨 玉齒臨 吽

拜手稽首

道清尼氏守中得一玄教度世大宗師

贊曰

我學老子我是道
陰陽升降顛而倒

竅中之竅玄又玄
吾身自有蓬萊島

唵 金齒臨 玉齒臨 吽

拜手稽首

釋牟尼氏空中歸一禪教度世大宗師

贊曰

我學釋迦我是釋
昆頂摩尼圓又赤

不生不滅自如如
這箇分明在咫尺

唵 金齒臨 玉齒臨 吽

拜手稽首

夏午尼氏道統中一三教度世大宗師

贊曰

我學林子我是夏
三教由來同一駕

立本入門極則終
徹古徹今徹上下

唵 金齒臨 玉齒臨 吽

拜手稽首

上來披宣四尼經略。莊誦三十六贊。修持
圓滿。懺謝精專。清靜一心。蠲除諸障。
和平永錫。品匯咸熙。心滿六虛。神通無

極。逍遙自在。與道合真。度世度人。功德無量。

唵 金齒臨 玉齒臨 吽 急急如

開天混虛無始至尊敕令

召集人 朱金坤

校訂 盧國濱 林如實

參校 陳性清 陳文樵 陳亞椿 陳麗星 許良生 李洪宗

黃文遠 黃秀英 王建設 凌朝暉 吳玉先 林坤林

李應金 溫明耀 鄭燦爐 鄭欽貴 張國章 邱添水

李德清 遊玉波 林瑞祿 劉文鳳 李金林 陳玉鳳

陳文玉 蔡國亮 李麗萍 曾洪德 曾秀瓊 朱金坤

排版打字 劉新尾 陳性清 鄭燦爐 鄭欽貴

捐資人 楓亭興華堂門人 朱金坤 徐良英（陸萬元）

蓋尾清山祠門人 林存芳（壹萬元）

貳零貳零年正月